

**Repons Diskour Bidze 2018 apre Delibreasyon bann manm Lasanble Nasyonal par Dr
Louis, Rene, Peter Larose, Minis pour Finans, Komers ek Plannifikasyon Ekonomik,
Vandredi 10 Novanm 2017**

Msye Spiker,
Onorab Lider Lopozisyon dan Lasanble Nasyonal,
Onorab Lider Zafer Gouvernman dan Lasanble Nasyonal
Manm Onorab Lasanble Nasyonal,
Pep Seselwa.
Bonzour

Msye Spiker, pandan sa dernyen trwa zour, mon'n ekout tre atantivman bann deliberasyon par bann manm Lasanble Nasyonal. Monn osi ekout e lir bann rekonmandasyon fer par bann diferan regroupman e osi sitwayen Seselwa. Mon konstate ki sa travay pou met sa bidze an aplikasyon i bezwen en travay kolektiv avek tou sektor.

1. Taks Progresiv

Msye Spiker, bokou in ganny dir lo sa nouvo Taks Progresiv lo saler. Monn apresye ki bann manm in rekonnet ki sa nouvo taks progresiv pou anmenn bokou benefis pou travayer seselwa. Sa bidze in ganny ankadre dan en lankadreman fiskal an prenon kont tou reveni e depans Gouvernman. Pour lannen 2018 noun prevwar en rediksyon 75 milyon roudoupi dan koleksyon taks lo saler, an prenon kont ki sa pou pran lefe en Zilyet 2018. Msye Spiker si nou konmans aplik sa nouvo rezim an Zanvye 2018, nou pou bezwen vwar reveni adisyonnèl ouswa koup depans Gouvernman par 75 milyon roudoupi. Msye Spiker pou lannen 2018, avek lenplimantasyon bidze lo en baz Program e Performans (PPBB) noun met larzan an plis selman pour bann nouvo program ou proze spesifik ki bann Minister e Departman in spesifye pou enplimante dan zot stratezi depans mwayen term. Nou proses bidze konmela pou byen e servis i fer ki nou re-kalkil kou sa bann servis ki bann Minister pou bezwen sak lannen olye zis ogmant bidze byen e servis par en pousantaz tou le zan parey ti ganny fer o paravan.

Nou osi bezwen konstate ki sistenm payroll dan bann landrwa travay i bezwen ganny amande pou fasilite aplikasyon sa nouvo sistenm. Lotorite Reveni Sesel (SRC) i bezwen fer en program ledikasyon pou asire ki sa sistenm i ganny byen konpran par anplwayer e travayer. SRC pou selman kapab fer sa program ledikasyon apre ki lalwa in ganny aprouve par Lasanble Nasyonal.

Alors Msye Spiker mon enplor manm Lasanble Nasyonal, ki menm si nou realize ki sa nouvo sistenm pou benefisyé 98% travayer seselwa, nou pou bezwen konmans son aplikasyon an Zilyet 2018. Mon kwar bann manm Lasanble Nasyonal i bezwen rekonnèt ki si Gouvernman ti annan sa mwayen pou konmans sa taks progresiv lo saler an Zanvyé 2018 nou ti pou fer li.

Zis pou azoute Msye Spiker ki an se moman 20,222 ouswa 54% travayer seselwa in deza benefisyé ek sa sistenm depi Avril e Zilyet 2016. Mon osi anvi konstate ki a parti Zanvyé 2018, tou bann legzanpsyon pou aplikab. Alors travayer pou konmans vwar bann benefis a parti Zanvyé 2018.

Msye Spiker nou pe rekonmand sa to 30% dan taks progresiv anliny ek to taks biznes. Noun propoze ki tou travayer ki ganny en saler par lao SR 83,333, selman en poursantaz zot saler ki pou tonm dan sa to 30%. 80 travayer Seselwa e 117 travayer etranze pou ganny afekte. I enportan pou apresye ki napa okenn graduate ki antre dan okenn lorganizasyon avek okenn lapey SR 83,333. Sa i en saler eksepsyonnel dan limenm. E alor prensip en sistenm taks progresiv se pour takse bann saler relativman o. E sa pratik i ganny aplike enternaysonalman dan tou sistenm taks progresiv. Msye Spiker, efektifman pour sa bann travayer ki ganny en lapey SR 83,333 e plis, selman sa sonm par lao SR 83,333 ki pou ganny takse lo en to 30%.

Alors Msye Spiker, Gouvernman pe mentenir sa to taks 30%. Sepandan avek lentansyon Gouvernman pou redwir to taks biznes 30% alavenir, ler sa i arive sa to 30% lo taks progresiv pou osi ganny revize. Si nou revwar sa to i pou kout bidze en sonm adisyonnèl SR 15 milyon avek son aplikasyon an Zilyet 2018. Msye Spiker nou pe anmenn amannman lalwa taks lo saler pou laprouvasyon Lasanble Nasyonal zis apre ki diskisyon bidze i terminen.

Msye Spiker, Gouvernman ti konmans propozisyon dan faz ‘White Paper’ lo taks progresiv e propoz en sistenm taks return. Me bokou anplwayer e travayer in vwar ki sa sistenm ti enpe konplike. Alors nou rekonnet ki alavenir nou pou bezwen entrodwir en sistenm parey. Sepandan aköz sa sistenm pou nouvo dan Sesel e prenon an kont kapasite SRC e anplwayer pou administre en sistenm parey, nou pou selman kapab entrodwir en sistenm taks return e osi fer provizyon pou enkli depans parey ledikasyon ouswa lasante ki travayer i peye, dan lefitir. SRC pe osi travay pou moderniz son sistenm.

Msye Spiker, sistenm taks lo saler pou aplikab lo saler total savedir lo saler de baz e osi alawenns. Nou bezwen fer en sistenm parey pou anpese ki annan labi dan sistenm taks e fer ki SRC i kapab anmas reveni ki i bezwen. Sepandan bokou in ganny dir ki taks i ganny kalkile lo saler total me ler ou ganny peye ou gratite, trezyenm mwan lapey ouswa konpansasyon sa i ganny peye zis lo ou saler de baz e pa enkli alawenns. Alors sa komite ki pe revwar sa lalwa saler piblik i ava fer en bon revi lo en tel propozisyon e vwar son lenpak lo bidze mwayen term.

Msye Spiker zis pou azoute ki ler en dimoun i pran retret son pansyon i ganny kalkile par Fon Pansyon lo sa saler total savedir i enkli tou son alawenns. Mon osi anvi fer resorti ki ler en travayer i al demann en lon avek labank son repeyman i ganny kalkile lo son saler de baz e osi bann alawenns ki fiks tou le mwan.

2. Saler e skim saler

Msye Spiker, bokou in ganny fer pou fer sir ki lapey sekter piblik i favorab pou travayer. Gouvernman in entrodwir ouswa reviz 167 skim saler pandan sa dernyen 8 an. Avek plis resours ki permet dan lavenir nou a revwar bann lezot skim saler.

Msye Spiker, Gouvernman in fer sir ki ler resours i permet in ogmant saler de baz. Zis pou note dan bidze 2014, Gouvernman ti ogmant saler par 10%, 15% e 20% le premye Zanvye 2014. Sa ti kout bidze 132 milyon rounpi. Nou rekonnet ki nou bezwen revwar sa lalwa saler sekter piblik e sa pou ganny fer pandan 2018.

Mon osi anvi azoute parey monn anonse dan Diskour Bidze 2018, ki travayer dan Gouvernman ki pa lo kontra, a parti Zanvye 2019 pou ganny en nouvo alawenns mansyel pou zot long servis ki zot in fer dan Gouvernman.

Msye Spiker, Gouvernman i donn son langazman pou kontinyen ek son resers pou vwar ki kantite fanmiy dan sak distrik ki pe vreman viv dan laprovrete. An rezilta sa, nou a kapab kree en levanter pou sak distrik e Minister responsab pou La Fanmiy pou bezwen moniter sak fanmiy sak lannen e fer sir ki zot ganny sa lasistans nesaser. E osi bann travayer sosyal a travay avek sa bann fanmiy pou konsey zot pou zot kapab sorti dan sa sitiasyon.

3. VAT Egzanpsyon

Msye Spiker, konmansman Avril 2017, Gouvernman ti pibliy en nouvo lalis egzanpsyon dan VAT e sa in koup reveni par SR 29 milyon roupi. Noun war son benefis pou konsomater. Sepandan nou bezwen fer plis, Msye Spiker pou fer sir ki kou lavi i desann e Seselwa i benefisyé.

Msye Spiker lalis egzanpsyon ki Gouvernman in entrodwir i long e apart ki sa katorz komodite esansyel, i ennan le zot ankor.

Sepandan mon oule lans en lapel avek medya pou piblr sa lalis e fer sir tou dimoun i okouran lekel sa bann komodite e servis ki napa VAT lo la.

Msye Spiker dan ladres bidze 2014 paz 21, Gouvernman ti entrodwir egzanmpsyon lo plizyer nouvo prodwir e servis, ki enkli: transfer propriete imouvab, tel ki later e batiman; lekipman e servis medikal, liniform pour lekol prive, e serkey. Me pandan sa letan osi, tou biznes ki son turnover I par lao SR 2 milyon ti bezwen anrezistre pour VAT lo son servis eksepte si sa ti ganny egzanpsyon dan lalwa VAT. Alors pou ladres bidze 2018 nou pe fer sir ki servis Feneray pou nepli pey VAT menm si okenn biznes dan sa domenn son turnover i par lao SR 2 milyon.

4. Balans Bidze

Msye Spiker bokou in ganny dir lo defisit bidzeter ki Gouvernman pe propoze avek lasanble. Mon oule klarifye ki Gouvernman pe propoz en bidze avek en balans sirplis primer 538 milyon rounpi ouswa 2.5 pousan Prodwi Domestik Brit (GDP) e sa i pa enkli lentere ki total i 709.3 milyon rounpi. Sa i paramet ki IMF i servi letan i negosye en programm avek okenn pei e osi Metodoloji 'Govenment Finance Statistics' i servi pou mezir performans fiskal en Gouvernman. Sepandan, mon konstate aköz sa lentere ki Gouvernman i peye son total sirplis i redwir pou ariv en balans total defisit 171.3 milyon rounpi. Me mon anvi rekonfirmen ki Gouvernman i reste lo bon semen pou redwir son det pou ariv 50 pousan Prodwi Domestik Brit (GDP) an 2020. Dan bidze, noun prevwar pou fini 2017 avek en det 67 pousan Prodwi Domestik Brit (GDP). E osi nou ti a kontan fer resorti ki Gouvernman i pran lon selman pou finans bann gro proze lenfrastriktir.

5. Depans

Msye Spiker, bokou in ganny dir lo depans Gouvernman. Mon konstate ki nou bezwen war kalite depans Gouvernman. Nou bezwen war plis depans dan proze kapital olye dan byen e servis. Travayer Gouvernman i bezwen annan target e nou bezwen asire ki sa target i ganny mentenir e i annan benefis pou lepep seselwa. Mon konstate ki, avek enplimantasyon bidze lo baz Programm Performans dan son totalite dan bidze 2019, nou pou vwar plis performans. Msye Spiker, Komite ki ansarz Odit Gouvernman i bezwen pran sa bann rekonmandasyon ki Oditer Zeneral in fer dan son rapor 2016 e travay avek bann Minister e Departman pou fer sir ki sa bann defayans ki Lofis Oditer Zeneral in mansyonnen i ganny adrese. Osi rapor ki FPAC in fer lo rapor Oditer Zeneral 2015, nou bezwen koman en Gouvernman pran sa bann rekonmandasyon e fer sir i annan lefikasite dan depans Gouvernman.

6. Air Seychelles

Management Air Seychelles in travay lo diferan opsyon e pe prezant devan bord pou konsiderasyon semenn prosenn. Alors ler Minis responsab pou touris i vin dan lasanble semenn prosenn I kapab donn plis klarifikasyon lo sa bann opsyon.

Zis pou azoute parey in ganny dir oparavan, Etihad Airways in siny en dezyenm kontra senk an pou li reste konman en partener 40% avek Air Seychelles.

7. Program Privatization

Msye Spiker, Gouvernman i reste angaze dan son promes pou ofer loportinite tou Seselwa pou investir dan bann lantrreiz leta ki pou ganny privatize dan lannen 2018. Sa I enkli L'Union Estate, Land Marine, IOT, e en serten kantite par dan DBS. Governman, I oule ki sa bann lantrreiz leta zot egziste pou fer zot kontribisyon sosyo-ekonomik aköz larzan ki ganny investir dan sa bann lantrreiz se fon piblik.

Msye Spiker, dan ka L'Union Estate i en propriyete ki ennan bokou potansyel pou ed pei asir son sekirite alimanter. Governman i dan demars pou lans prosedir tender pou rod en partener stratezik ki kapab fer marse sa lantrreiz. Digwa a ganny loportinite pou aste par dan sa lantrreiz apre ki rapor finansyel in ganny finalize komansman 2018.

8. Home Carers

Msye Spiker tou bann Home Carers ki travay full day i resevwar zot benefis konze 21 zour par lannen e si zot travay Half Day zot ganny zot benefis 10.5 zour konze par lannen. Pandan lannen 2017 Lazans proteksyon Sosyal in deza konmans en kad devlopman profesyonnel pou tou Home Carers e sa pou osi kontinyen an 2018.

Msye Spiker, moralman donn swen a nou vye paran i reste lobligasyon sak zafan. Se zot kin okip nou pandan lanfans. Se zot kin tonbe leve pou nou. Sa i pan enn latas fasil pou zot. E i osi pa en latas fasil prezan pou sa bann zafan ki vwar zot bezwen okip zot paran. E alors pou sa ki bezwen lasistans avek zot vye paran, swa en konze, en pti repo, i kapab fer laranzman pou met zot vye paran pou en serten letan dan Lospis, e apre rebran zot.

9. SRC

Msye Spiker mon rekonnèt zefor ki travayer SRC pe fer pou zot kolekte maksimonm reveni. Alors mon lans en lapel avek tou taks peyer pour ki zot donn SRC lenformasyon korek ler zot fer zot deklarasyon taks. E apre tou zot bezwen pey taks pour fer ki Governman i kapab fonksyonnen. An sa ki konsern aryeraz ki mon ti deklare, noun ariv dan en staz avanse dan negosyasyon avek 'Forensic Auditors Internasyonnal' pou fer sa travay pou Sesel. Parey zot ava kapab apresye nou bezwen fer en travay ki byen e kot nou ganny "value for money" apre ki nou ganny lopinyon legal avek nou konseyer legal.

10. Transfer Pricing

Deviz ki Sesel i zenere i appartenir pou nou pei. Tou reset deviz etranzer fodre pas atraver nou sistenm banker. Ler nou regard kantite deviz ki rantrer dan lekonomi Sesel nou estimen ki i ennan bokou deviz ki reste a letranze. Sa sitisasyon i mal e nou pa kapab kontinyen tolere. En 2018, nou pou bezwen fer en odit lo bann lakonpanyen ki nou sispekte zot gard zot deviz aletranze. Nou bezwen fer rentre tou deviz pour ki Seselwa a benefisyé.

11. Divizyon Fast Track dan Customs

Msye Spiker, mon ti masyonnen dan mon ladres bidze ki ler nou reorganiz Custom boner 2018, nou pou annan en divizyon fast track pou tou kargo ki ariv Sesel, ki swa pou Mahe, Pralen e Ladig. Sa i a ede redwir bann sarz ki enportater i fer fas avek. Rezilta i a fer redwir kou lavi

12. Lasirans lo Enportasyon Marsandiz

Msye Spiker, mon fer en demann avek Lasosiyasyon Lasirans ki zot kapab fer en propozisyon avek kominote biznes ki zot kapab asir tou kargo ki vin dan pei e fre lasirans a ganny sarze an rounpi e non pa en deviz entranzer. Zot pou konsider sa propozisyon.

13. Developman lo US\$50 million

Msye Spiker, Anti Corruption Commission pe fer son travay e mon swete ki tre byento zot a donn lasanble en rapor lo sa size.

14. Travayer entranze

Msye Spiker nou annan 17,332 travayer entranze dan Sesel ki aktiv. Dan sa sif nou annan 2,405 travayer dan pozisyon management ouswa dan kad profesyonnel. Sa i ekivalan 14 pousan total travayer etranze. Alors Gouvernman pou evalye propozisyon kin ganny fer dan son reform biznes taks, e vwar ki lakadreman i kapab ganny fer pou fer sir ki bann biznes i donn kapasite sa seselwa pou pran sa bann pozisyon management.

Loportinite travay i egziste ozordi Sesel pou tou dimoun. Sans pou devlop nou kapasite profesyonnel i osi alaporte tou zenn e travayer, atraver letid avanse ki Gouvernman i finanse antraver Lazans Nasyonal Devlopman Resours Imen e osi lezot lof ki ganny ofer par nou bann pei partener. Me parkont, nou annan defayans kapasite dan serten profesyon e sekte.

Pou 2018, Gouvernman in deza anonse ki i pou revwar e ranforsi son polisi lo rekritman bann etranze, sirtou lo kad profesyonnel e lo pozisyon management ki nou seselwa i kapab fer. Dan ladres bidze noun anons bann mezir konsesyon taks ki pou ganny mete an 2019 pou bann biznes ki ankouraz zot anploy seselwa avek sertifika, diplomm ou degre ouswa pou ankouraz zot pou donn plis formasyon nou bann seselwa.

15. Fon Devlopman pou Pralen

Msye Spiker noun ekout rekonmandasyon bann manm Onorab sorti Pralen ek La Dig. Alors nou pe revwar nou alokasyon pou Fon Devlopman pou Pralen e ariv SR 1 milyon pou fer sir sak distrik lo sa zil Pralen i ganny 500,000 rroupi.

16. Konstriksyon Lakaz

Msye Spiker apard ki alokasyon bidzeter pour konstrir lakaz i annan SR 150 milyon ki fon Pansyon in pret PMC e SR 200 milyon ki bann labank pou pret PMC pou fer sir ki sa bann proze dan distrik i ganny konplete. Minister konsernen pou donn plis detay lo bann lezot proze ki pe ganny finanse avek sa bann lon.

Msye Spiker, Gouvernman ti lans tender pou okenn biznes ki anvi ofer zot lentere pou konstrir lakaz alternativ lo en kou SR 4,500 par met kare. Sa ti ganny fer le 22 Desanm 2016. Le 15 Septanm 2017, kontra ti ganny signen par 2 kontrakter pou fer de lakaz “Semi-Detached” 95 met kare sakenn. Letan sa proze i terminnen nou pou dan en pli bon pozisyon pou vwar ban nouvo fason konstriksyon lakaz.

17. Konklizyon

Msye Spiker bokou in ganny dir dan sa bidze, me konman Minis Finans, Komers e Planifikasyon Ekonomik mon pou bezwen fer sir ki annan plis ledikasyon lo sa bidze ki dimoun i konpran ki i annan benefis pou zot tou dan sa bidze.

Msye Spiker, bokou propozisyon in ganny mansyonnen pandan sa trwa zour. Mon Minister pou reste angaze pou analiz sa bann propozisyon pli profon e nou ava diskite ankor avek bann manm Lasanble Nasyonal e manm Piblik. Bann lezot klarifikasyon spesifik lo bann proze oubyen program lo sa bann Minister e Lazans i ava ganny eksplike an detay dan staz komite par sa bann lorganizasyon respektivman.

Msye Spiker mon profit sa lokazyon pou remerye manm Lasanble Nasyonal e manm piblik pou zot kontribisyon dan sa prosedir bidze 2018. Mon konstate ki dan staz komite pou annan osi bokou klarifikasyon pou fer sir ki lepep Seselwa i konpran kwa ki dan sa bidze.

Mersi.